

Ikerketa arloko sari entzutetsua jaso du Pedro Miguel Etxenike fisikariak Bonnen

Alemaniko Max Plack ikerketarako erakunde sonatuak eman dio merezimendua


Pedro Miguel Etxenike zientzialari nafarrak beste sari bat gehitu zion atzo azken urte hauetan lortutako zerrenda luze eta garrantzitsuari. Alemaniako Bonn hirian, Max Planck izen handiko zientzia elkarteak fisika alorreko aurtengo saria eman zion atzo arratsaldean Izabako ikertzaileari.

Erredakzioa / Donostia

PEDRO MIGUEL ETXENIKE Euskal Herriko Unibertsitateko Materia Kondentsatuaren Fisika-kateko katedradunak Nazioarteko Elkarlanerako Ikerketaren saria jaso zuen atzo Max Planck elkartearengandik. Zientzialari nafarrak denbora gutxian lortu duen laugarren sari entzutetsua da hau. Izan ere, Ikerketarako Euskadi Sariaren eta Vianako Printzearen Sariaren ondoren, Asturiasko Printzearen izena daramana jaso zuen orain bi hilabete.

Max Planck elkarte oso entzutetsua da nazioartean. 1948 urtean sortu zen ikerketak sustatu eta zientzia bultzatzeko; Royal Societyekin batera munduko garrantzitsuentzat daukate adituek. Elkartearen egoitzetan 10.700 langilek dihardute, eta dirutza handiak bideratzen ditu ikerketarako. Elkarte horretako hamabost kidek lortua dute Nobel saria Fisika, Kimika eta Medikuntza arloetan.

Max Planck elkarteak atzo arratsaldean egin zuen saria emateko ekitaldia Bonnen. Pello Salaburu EHuko errektoreak lagunduta joan zen Etxenike saria jasotzera. Elkarteko presidentearen eskutik, oroitarria eta 21.500.000 pezetako txekia jaso zuen zientzialari nafarrak



Pedro Miguel Etxenike zientzialaria, EHuko bere bulegoan.

JAGOBA MANTEROLA

(860.000 libera). Dirutan jasotakoa Donostian eraiki asmo den Physic Centren egingo diren Azaleretako Magnetismoa eta Azaleretako Elektroien Dinamikari buruzko ikerketetara bideratuko da. Ikerketa horiek elkarlanean egingo dira Alemaniako Osnabruck eta Erlangen-eko unibertsitateak eta Max Planck erakundeko bi institutuekin.

Etxenikek, ohi duenez, apaltasunez jaso zuen saria. Onartu zuen sari hau berarentzat garrantzitsua dela oso, baina batez ere EHUri emandako merezimendua dela azpimarratu zuen. «Saria ohore pertsonala da baina bereziki agerian uzten duena da EHUn badaudela zientzialari taldeak munduko onenen maila bera duenak».

Azpimarratu zuen, gainera,

Pedro Miguel Etxenike:
«Saria ohore pertsonala da baina bereziki agerian uzten duena da EHUn badaudela zientzialari taldeak munduko onenen maila bera dutenak»

sariaren diruarekin egin ahal izango diren ikerketek aukera emango dietela zientzialari gazteei ikerlan onak egiteko. Salaburuk gaineratu zuen, ildo horretan, «mirari antzeko» bat izan dela saria, kontuan hartuta EHUK ikerketarako duen aurrekontu murritza.

Nazioarteko Elkarlanerako

Ikerketa Saria arlo ugartan banatzen du urtero Max Planck erakundeak. Fisikari dagokiona jaso zuen atzo Etxenikek, baina beste esparru askotakoak ere banatu zituzten: Biozientziak eta Medikuntza; Kimika eta Farmazia; Ingeniaritza; Arteak eta Giza Zientziak, Geozientzia eta Astronomia.

Sarirako hautagaiak arlo guztietakoak eta mundu osokoak izan daitezke. Alemaniako Unibertsitateetako errektore eta zientzia elkarteak aurkeztu ahal dituzte hautagaitzak, baita aurrez Max Planck saria lortuta duten zientzialariek ere. Hautagaien artean saria nori eman Max Planck eta Alexander von Humboldt-Stiftung erakundeetako ordezkariak osatutako batzorde misto batek erabakitzen du. X

A-8ko Arroa-Zarautz tarteko bidesaria kentzeko eskatu dute IU, HB eta Eguzkik

■ Ekologistak Sustapen Ministeriora zuzendu dira hark neurriak har ditzan

Erredakzioa / Donostia

ZUMAIA eta Getaria artean izan den ezbeharrak N-634 errepidea denbora luzez itxita edukiko duela eta, IU eta HB alderdiek eta Eguzki talde ekologistak Arroa-Zarautz tartean A-8 autobideko bidesaria ken dadin eskatu dute. Bat egin dute, hortaz, Getaria eta Zumaia udalek ezbeharraren ondoren egindako eskariarekin.

Eguzki talde ekologistak, gainera, Madrilgo Sustapen ministeriora jo du —hura da A-8 autobidearen titularra— kostako errepideko erabiltzaile ohikoenentzat kalterik izan ez dadin, Arroa-Zarautz tartean behintzat bidesaria bertan behera uzteko. Eguzkik Madrilera helarazitako idatzian argudiatzen du baldintza hauetan bidesaria ordaindu behar izatea Errepide Legearen aurkakoa dela. Izan ere, lege horrek dio ezin dela dirurik eskatu errepide batean baldin eta hark alternatibarik ez badu; eta ekologisten arabera, Meagakoa ez da alternatiba.

Eguzkik bezala, Gipuzkoako Herri Batasunak ere azpimarratu du doaneko alternatiba benetakorik gabe geratu direla Zumaia eta ingurukoak, eta horiei bidesaririk kobra ez diezaioten eskatu du.

Ezbeharraren harira, HBk aldarrikatu du Bilbotik Behobiarako autobideak «erabiltzen publikoa» behar duela, «hori baita kostako herriak lotzen dituen bidea». X

Egunkariak

urte
beteko
ditu
igandean



Abenduaren

6an zure kioskuan

DOAN !!

urtekaria 98